

16

52626/P

42650

DISSERTATIO INAUGURALIS
MEDICO - CHIRURGICA

RECESSUM OSSIUM NASI

EXHIBENS

QUAM

SUB AUSPICIIS DIVINI NUMINIS

EX DECRETO

GRATIOSÆ FACULTATIS MEDICÆ

PRO LICENTIA

GRADUM, HONORES AC PRIVILEGIA DOCTORALIA

RITE CONSEQUENDI

DIE XXVI. MENS. AUG. MDCCLXVII.

H. L. Q. C.

SOLENNI ERUDITORUM EXAMINI SUBJICIET

IOHANNES JACOBUS WASER

Helveto-Tigurinus.

A R G E N T O R A T I

Ex Officina JOH. HENRICI HEITZII Universitatis Typographi.

Digitized by the Internet Archive
in 2018 with funding from
Wellcome Library

<https://archive.org/details/b30347208>

V I R O

PRÆNOBILISSIMO ATQUE EXPERIENTISSIMO

D O M I N O

IOHANNI HENRICO FEHR

MED. ET CHIRURG. DOCTORI PRÆCLARISSIMO

VENERABILI MEDICORUM PATRIÆ TIGURINÆ SENI
PATRONO AD CINERES USQUE SINCERE PROSEQUENDO

V I R O

AMPLISSIMO ATQUE EXPERTISSIMO

D O M I N O

IOHANNI CONRADO MEYER

IN SUPREMO REIPUBLICÆ TIGURINÆ SENATU

DUCENTUMVIRO

PRIMARIOQUE OPERATORI DEXTERRIMO

AVUNCULO ET PRÆCEPTORI AD URNAS COLENDO

V I R O

PLURIMUM REVERENDO DOCTISSIMOQUE

D O M I N O

IOHANNI JACOB WASER

IN CLASSE ECCLESIASTICA SUPERIORIS

TURGOVIÆ CAMERARIO

EGNACENSIVM PASTORI

PARENTI OPTIMO

DISSERTATIONEM HANC INAUGURALEM

ÆTERNI GRATISSIMÆ MENTIS

MONUMENTI LOCO

SACRAM ESSE VULT

TANTORUM NOMINUM

OBSERVANTISSIMUS

AUCTOR.



PROOEMIUM.



Postquam per longum temporis spatium sub ductu Clariss. Dn. MEYER, Avunculi mei maximopere colendi, ac patriæ urbis Chirurghi primarii, Chirurgiæ operam navaveram, perque aliquot annos illam inter Helveticas Belgarum copias exercueram, non solum in alma Argentoratensium Universitate, sed & in aliis in quibus commorari contigit, celeberrimorum Virorum præcepta circa Artem, cui me dicaveram hausi; Chirurgiam autem tanquam Medicæ doctrinæ partem, a nemine rite addisci posse, quin hujus principiis probe imbutus sit, cum persuasissimum mihi fuerit, reliquarum simul Saluberrimæ Artis partium solidam ut acquirerem cognitionem sollicitè allaboravi; tandem academicæ vitæ finem impositurus doctoralia statui subire Examina, cumque Specimen Inaugurale ex Universitatis legibus conscri-

bere fuerim iussus, id ipsum ex Chirurgiæ doctrina depromere, cujus in me, ob studii consuetudinem, aliqua prædilectio est, constitui. Cum autem ad scribendum animum adverterem, non parum dubius hæsi in seligendo themate, cum ex una parte urgens in patriam reditus temporis rationem habere suaserit, ex altera autem, perfunctorie aliquid conscribere mihi displicuerit. Primum quidem statueram de variis Epiphoræ speciebus mea in publicum proferre cogitata; hanc autem tractationem, quod pro dignitate per temporis angustiam perficere eam non liceret, animo perpendens, seponere iterum coactus sum. Tandem, postquam diu fluctuaverat animus, memini me ab Experientissimo Dn. LOBSTEIN, *Med. D. ac Theatri anatomici Prodemonstratore celeberrimo, Patrono ac Præceptore meo summopere colendo*, cum Ejus præceptis fruerer, Morbi articulationis satis singularis historiam accepisse, quem *Ossium Nasi Recessum* appellare placuit. Adii Virum Experientissimum, utque casus expositionem mihi concederet, decenter petii; Ille pro humanitate sua insigni petito annuit, sequentemque historiam perpendendam mihi dedit.

HISTORIA MORBI.

JACOBUS HELCK, *Legionis Equitum regio-germanicæ (Royal-Allemand dictæ) Miles*, cum forte cum commilitone rixaretur, pugno in faciem adacto, vehementer super-

nasum dorsum ab illo percussus est. Statim quidem dolorem satis levem se sensisse, nec ullam sanguinis guttulam e naribus fluxisse, retulit; postero autem die in immensum tumefactum nasum, vicinasque ejus partes cœruleoque fuisse suffusas colore, qualis in leviter vexatis esse solet. Hac cum sine incommodis relictis rursus disparuerent, nihil præter leve tuberculum in illa parte remansit. Ita per quadriennium nævum tulit, usquedum, cum hic Argentorati versaretur legio, ad insignem radix nasi elevata sit molem; tandem exortus est in utroque interno oculorum cantu tumor tactu mollis, fluctuantem intus sistens materiam, ita ut alter alteri facta pressione responderet, ac satis facile per nasi radicem, in oppositum cantum contentus liquor adigeretur. Homo, qui integra cæterum fruebatur valetudine, immatunibus, quotiescunque tempestatum variationes minaretur cælum, cruciabatur doloribus, cumque cæterum facie formosus esset, ut molestiis hisce liberaretur, speciemque pristinam recuperaret, statuit malo suo medicinam quærere. Adiit itaque dexterrimum Dn. SCHÆFFER, legionis primum Chirurgum, a quo ut opem sibi ferret valdopere petiit. Hic, ut de re sua certior fieret, in consilium duxit Experientissimum Dn. D. LOBSTEIN, quidque de eo casu sentiret, ex eo quasivit. Inspecto manibusque contrectato tumore, satis manifeste ossium nasi extrema in eo loco tactui sese offerebant, quo ista cum frontali committuntur, ita ut facile agnosci potuerit, eorum radices a frontali maxillari- busque ossibus esse remotas, quam tamen rem, si ossium horum commissuras ex Anatome repetere quis voluerit, fere impossibilem judicabit; suasit itaque Medicus Chirurgo, ut tumorem sinistro in cantu, ubi quippe magis elevabatur, palpebras premebat, lachrymalisque materiæ per puncta lachrymalia resorptionem impediabat, sectione divideret. Itaque præmissis e consuetudine evacuationibus, lanceola per longitudinem apertus est tumor, ex qua incisione, licet ita magna

non fuerit, aquæ luteo colore tinctæ aliquot uncia effluxerunt; specillo cum exploraretur vulnus, suspicionis apparuit veritas, nasi enim ossa vere a vicinis, cum quibus connecti solent, divisa, elevataque reperta sunt. Vulnus ad leges artis injecto linteo carpto, imposito pulvillo, atque Emplastro fusco deligatum est. Peractis his, stupendis capitis doloribus, febre, siti vexatus est ager, facies in immensum in eo latere, quo facta erat incisio, tumere, & palpebræ inflammari cœperunt, quibus Symptomatibus Venæsectiones repetitæ, Ene-mata, Pulveres temperantes, Cataplasmata emollientia atque anodyna, Injectiones ex Rad. Peuced. Aristoloch. longæ, levi Hordei decocto, Mellis rosati parum adjecto, paratæ opponebantur; his remediis ita cessit morbus, ut palpebræ genarumque tumor tamen hætenus superessent. Accidit tunc, ut vulnus, cum incisio tumoris amplitudini par non fuisset, supercrescente carne pene clauderetur, quod ut ampliaret, Chirurgus, iteratam sectionem instituit; & ut apertum illud servaret, Spongiam præparatam isti immisit atque Emplastrum de mucilaginis superimposuit. Accidit autem, ut cum forte specillo exploraret vulnus, ad digiti fere longitudinem illud in interiora illaberetur, quo educto, supra dictæ materiæ paulo tamen spissioris magna effluxit copia. Hac rerum facie febre nulla laborabat ager, nisi cum diætæ vitio accenderetur; vix autem ferre potuit Spongiam præparatam, ac magnopere querebatur, dolore eximio inde sese affici, quare vulnere immissæ fuerunt cannulæ plumbeæ, quibus ut in vulnere supercrescens caro exederetur, Alumen ustum supersternebatur, cannula in vulnere Emplastris agglutinativis firmabatur, relicta apertura, qua efflueret materies, quæ ab oculo, imposito figurato emplastro avertebatur. Continuata est abhinc ita curatio, ut supradictæ Radices in Vino decoquerentur, vulnereque injiceretur decoctum; quo facto minui istius materiæ copia, dolores pacari, tumor sedari, inque melius se vertere morbus cœperunt. Indocilis autem

autem ingenii homo, & ad diætæ observantiam ægre persuadendus in causa fuit, ut aliquoties novis supervenientibus inflammationibus impediretur morbi cura, ac denuo materiæ supradictæ fluxus excitaretur, quæ tamen symptomata iisdem remediis iterum cobibuit Chirurgus. Tandem autem nova affulsit spes, fore ut debellaretur tandem pertinax malum, quare cannularum magnitudo indies aliquantulum minuebatur, ne ab intus claudendum vulnus a sanatione impediretur, quod quoque sedato materiæ fluxu ad cicatricem perductum est, quæ ut reliquam cutem æquaret, ab excrecente carne Lapide infernali liberabatur; tumor remittere se coepit, atque difformitatem suam latus evanescere vidit miles. Cum autem non ita facile elevata nasi radix in pristinum rediret locum, gradatis ista impositis spleniis, injectaque fascia circulari paulatim durante hac curandi methodo, ita ad pristinam redigebatur molem, ut ossa iterum in sedem suam reposita fuerint, atque diffolato penitus tumore, non nisi cicatrix præteriti morbi vestigium superesset.

S. I.

Morborum genus, quo ossa distincta quidem, sed inter se adaptata ligamentisque juncta, a se invicem recedunt, ita ut aliqua lædatur functio, generali *luxationis* nomine comprehenderunt medicarum rerum Scriptores. Ponit illa affectio vim, illa, qua ossa inter se cohærent majorem, qua ex naturali sua sede in alienam trudentur, ligamentis quæ nunquam non ossium inter se connexiones comitantur, plane infirmatis, quo vel ossium ipsorum, vel vicinarum partium, vel utrorumque naturalis functio non potest non tolli aut alterari.

§. II.

Multas illud mali genus admittere species fatis quisque perspiciet, si varios ossium positus figurasque, varias ossium commissuras, quas Anatomici in diversa genera digesserunt, inque his ligamenta, cartilagines, aliaque huc pertinentia momenta considerare velit. Superfedeo quidem his recensendis commissurarum divisionibus, quas accuratissime jam tradiderunt Illustris WINSLOVIUS *a)* atque Cel. PLATNERUS *b)*; sed luxationum potius rimari differentias ad scopum meum propius pertinere duco. Varia autem luxata recipiunt discrimina; ac primo quidem non omnibus æque late extenditur istius vocabuli vis, ut a quibusdam pro omnibus qualiumcunque commissurarum recessibus sumatur, inter quos ex veteribus CELSUS *c)*, ex recentioribus autem Cel. PLATNERUS *d)* atque Ill. GAUBIUS *e)*, Cel. HEISTERUS *f)* cum pluribus aliis numerandi sunt; proprio tamen ac recepto loquendi modo, dislocationes articulorum mobilium tantum comprehendat, quo sensu P. ÆGINETA *g)*, BOERHAVIUS *h)*, Ill. VAN SWIETEN *i)*, plurimique recentiorum illud acce-

a) *Exp. Anat.* Tom. I. §. 118-159. *de Synarthrosi in spec.* §. 140-145.

b) *Inst. Chir.* §. 1092. 1093. & 1094.

c) *de Re Medica* Lib. VIII. C. XI. bifariam distinguit luxationem, nam "modo, inquit, quæ juncta sunt inter se dehiscunt modo articuli suis sedibus excidunt."

d) *Institut. Chirurg.* §. 1090. dicit: "articuli, si sedibus suis excidunt, & ossa, quæ naturaliter juncta sunt, si inter se dehiscunt, luxata vocantur."

e) *Institut. Patbol.* §. 226. eandem fere, licet mutatis verbis, tradit definitionem. Ill. quoque VAN SWIETEN, quem tamen in sequentium refero numerum, luxationem ita definivit.

f) *Institut. Chir.* P. I. L. III. C. III. ossium nasi recessum nominatim proprio capite pertractat.

g) Lib. VI. C. III.

h) *Aphor.* §. 358.

i) ad l. c.

perunt. Differunt autem quoque ratione facilitatis, qua articulus præ altero citius e cavitate sua egreditur, facilius enim in pueris ac adolescentibus, quam in robustioribus articuli excidunt; facilius quoque qui Arthrodia, quam qui Ginglymo cohærent. Quandoque etiam penitus ex sua sede prorumpunt, tumque *perfectam luxationem*, ἐξάρθρωμα constituere dicuntur; quandoque non prorsus recedunt, sed aliqua parte subsistunt, adeoque *imperfectam luxationem* s. *subluxationem*, παράθρῳμα efficiunt, quamvis & hujus ultimi vocabuli significatum ad immobilium ossium recessus referant illorum nonnulli, qui cum recentioribus luxationem in articulis mobilibus tantum assumunt *k*). Modo in luxatione articuli sola consistit malum, nec alias in sui consortium trahit partes, quam luxationis speciem *simplicem* appellant, modo ossa cum vulnere, contusis etiam vexatisque carnibus loco moventur, quod periculosissimum genus inflammationis, gangrænæ, mortisque quoque metum incutere solet, *complicatam* appellant luxationem. Vetustas quoque luxationum discrimen inter eas efficit, ut felicius curentur *recentes*, ægerrime, vel plane non *inveteratæ*. Pessimi tandem ingenii luxationes in juniorum ossibus evenire solent, quando eorum epiphýses secedunt, medium inter fracturas atque luxationes genus constituentes.

§. III.

Ad Synarthrosin referunt Anatomici articulationis speciem, qua nasus cum frontali osse committitur, in qua luxationem vel plane non, vel rarissime fieri unanimi ore affirmant Authores. "Ossa Synarthrosi juncta luxationi „non sunt obnoxia, sed si secedunt, fractura a se invicem „separantur," secundum Cl. KNOLL *l*). Cel. HEISTER de

B 2

k) HEISTER *l. c.* L. I. C. I. §. 3.

l) *Diff. de Extrem. super. lux.* Arg. 1738. §. IX. pag. 15.

narium ossibus in specie affirmat, "ea ita firmiter cum frontis atque aliis ossibus cohærere, ut frangi citius quam distrahi a se invicem queant." *m)* Elucescit ex his oppido rarum insolitumque esse casum, quem de milite nostro recensui, neque in multorum, præter Cel. HEISTERUM *n)*, Cl. LUTHER *o)* ac Cl. LE CLERC *p)* scriptis ejus occurrere mentionem puto; huc enim pertinere casum, quem SCULTETUS *q)* recenset, non existimo. Quamvis autem possibilem esse horum ossium secessum historia nostra evincat, an tamen inter luxationes pertineat, nondum confecta est quæstio; etenim licet casus sit luxationibus analogus, ac juxta strictam vocabuli etymologiam ad illas omnino referri possit, sunt tamen graves, quæ nos induxerunt rationes, ut eum ab illis distingueremus; sunt enim in nostro casu multa a reliquis ossium dislocationum symptomatibus ita distincta, ut morbum hunc articulationis plane singularem illa denominatione appellari non posse facile elucescat. Illud præcipue in nostro casu a vulgaribus luxationibus quam maxime alienum existimo, quod, cum non facile in tota reliqua ossium compage aliud hujus Synarthroseos exemplum repereris, quod commissuræ latitudine, dentium quæ incisionibus respondent fortitudine, ac consequenter futuræ firmitate huic par esset, non potuerint ex ista evelli narium ossa, quin dentium complures vi percutiente effracti causam expellentem, quasi adjuverint ac permiserint, ut eo facilius ossa elevarentur. Cum itaque casus noster recepto inter recentiores loquendi usu ad luxationes proprie dictas referri non possit,

m) l. c.

n) l. c.

o) *Dissert. de Luxat.* Erford. 1745. §. 15. pag. 19. dicit: "nasi ossa suo exire posse loco," experimenta tamen nulla affert.

p) *Chir. compl. Sect. de Luxat.* C. I. Liege 1697.

q) *Armament. Chir. Obs. XXII.* de ossibus nasi fractis ac depressis loquitur; ita ut fragmenta in carnes intrusa fuisse videantur.

ossum nasi recessum potius eum appellari posse visum est, cui tamen ita cum luxationibus aliqua analogia intercedebat, ut causas efficientes & signorum quædam, cum istis communia, prognosin autem accuratiorem ab iis diversam sibi que peculiarem habuerit.

§. IV.

Causas luxationum in vi cohærentiam articulorum exsuperante quærendam esse §. I. monui, quarum duplex dari genus, *externarum* nempe ac *internarum*, hasque sæpe simul conspirare, vix attinet, ut dicam; ad externas referuntur ictus, casus, luctationes, saltus, torturæ aliaque his similia, quibus, si violentiora fuerint, membra facile expelli posse quotidie tristis evincit experientia. Sed magna quoque internarum causarum caterva articulos ex sedibus suis extrudere solet, quas graphice describunt BOERHAVIUS atque Ill. VAN SWIETEN *r)*, quarumque exempla satis magno numero collegerunt Observatores. Ab incunabulis, uti aliorum morborum, sic quoque hujus per sæpe nutriunt fomitem mortales, quando cum male conformatis articulis, ligamentis laxis, labe aliqua hæreditaria rhachitica *s)* sive venerea nascuntur. Quandoque a fortiori contractione musculorum fieri optime monent, Ill. GAUBIUS *t)*, PLATNERUS *u)* atque Cl. HIERONYMI *x)*, "aliquando enim publico sese exposuerunt spectaculo histriones, qui omnes fere articulos corporis, sola musculorum vi luxare, atque iterum reponere noverant, & cereum quasi corpus in quasvis fere figuras flectere;" *y)*

B 3

r) l. c. §. 362.

s) vid. PLATNER §. 1104. atque Cl. OOSTERDYKSCHACHT *Instit. med. pract.* L. II. C. VI. §. 7. & 8.

t) *Instit. patholog.* §. 227. *u)* l. c.

x) *Diff. de Luxat. & sublux.* Jenæ 1746. §. 7. pag. 5.

y) VAN SWIETEN l. c.

nec mirum, cum femoris fractura a sola validiore musculorum contractione facta legatur z); ligamenta quoque si viribus ex quacunque causa destituantur, vel rumpantur, luxationes levissima ex causa fieri observarunt Chirurgi, facile quidem reponendas, sed facile iterum elapsuras, qualium exempla HEISTERUS a), SALZMANNUS b) atque Cl. KNOLL c) congesserunt. Sunt præterea, quæ ab intus articulos ex cavis suis mole sua exsuperante extrudunt, ita ut vel reponi nequidem amplius queant, quales sunt materiæ tophaceæ in articulis ad insignem sæpe molem excrecentes, exostoses, hisque similia. Interdum in articulos, „præcipue in profundiores, vel etiam quando-
„que in exiguos sinus, quibus ossa contra sita excipiuntur,
„humor confluit, quo indies augefcente, os pedetentim
„e sede sua promovetur,” uti eleganter dicit PLATNERUS d), isque vel ex morbofa sanguinis massa proficiscens, cum scilicet humores viscidiores, crassiores, tenaciores, in istas cavitates deponuntur, aut febrilis seu variolacea materies in articulos inclinatur, aut si ex suppuratione puris in articulo accumulatio fiat, ex qua causa sæpius luxationes factas, se suis erroribus didicisse fatetur Cel. PETIT e); vel sani ibidem confluunt humores, quorum scaturigines pro varia articulorum structura variæ esse solent, nam si lubricum illud linimentum f), quod articulorum cavitates irrigare solet, ea quantitate non refo-
betur, qua ab arteriis affunditur, accumulabitur illud, ligamentum distendet ac debilitabit, unde facilis ossis ex articulo suo delapsus; quam luxationis causam ipse Medi-

z) *Journal de Med.* Tom. XI. mens. Octobr.

a) *l. c.* P. I. L. III. C. I. §. 14.

b) *Diff. de Luxat. Fem. rar.* Arg. 1743.

c) *Diff. cit.* §. 12. not. r.

d) *l. c.*

e) *Mem. de l'Acad. Roy. des Sc. A.* 1722. pag. 117.

f) Triplicem in articulos concurrere humorum docet Physiologia; nempe universale perspirans, oleosum, medullosum ac mucilaginem a glandulis secretam. vid. Cel. PLATNER *l. c.* §. 1099.

cinæ Parens HIPPOCRATES jam pulchre describit g), five quod evenire quoque crebrius solet, extrinsecus ita læditur articulus, ut vel inter ipsa conjuncta ossa, vel in articuli cavo, colligatur materia heterogenea, quæ infirmando ligamenta & mole sua pedetentim aucta tandem os ex sede sua expellat, quod nostro in casu accidisse videmus: quomodo autem id factum sit inquirere postulat materiæ ratio; equidem ita illud contigisse existimo.

§. V.

Adactus in faciem pugnus in tota ad radicem nasi sitarum partium compage vehementem concussionem excitavit, cujus tamen omnis vis in commissuram ossium nasaliū cum osse frontali integumenta que ipsa tegentia impenfa est. Strictior earum partium structura fecit, ut nulla vaporum ruptio contingerit, dolorque modicus læsioni supervenerit; tumor quem postridie supervenisse monuimus, cutis inter dura corpora, vim nempe externam atque ossa, collisæ symptomata sine dubio fuit, quod facile tulit rudioris temperamenti homo. Commissura interim ossium, effractis ejus infimis dentibus, e sede sua mota erat, sed inde non potuerunt non functiones vicinarum partium lædi, & dislocata ossa necessario membranæ pituitariæ, quæ totam narium cavitatem investit, hincque ossibus subjacet, injurias inferre debuerunt. Narium autem omnis cavitas perpetuo perspirabili materia, quæ sensilissimos nudosque membranæ nervos ab externi aëris injuria defendat, madet, ex numerosissimis arteriis, quas Natura huic membranæ superstravit, ita ut injecta tota pulcherrimo coccineo colore ludat, scaturiens; nec minore copia revehentes venæ hic locorum adlunt, quæ fluidissimam ejus materiæ partem perpetuo ex arteriis sudantem perpetuo

g) *de locis in homine* C. III. T. VII. p. 361. edit. CHARTER.

refugunt, sanguinisque circulo iterum tradunt, ob fabricæ teneritatem vel levissimis injuriis obnoxia; quid itaque mirum, illas potissimum a dislocatis ossibus elisas, atque ad illam quam naturaliter exercent functionem inhabiles redditas, lympham a fortioris structuræ arteriis continuo emissam, in superiori membranæ parte reliquisse, quæ sensim sensimque aucta ex una parte membranam ipsam paululum ab ossibus dimovit, eam ita pressit, sensibilemque effecit, ut vel aëris quoque variationibus affecta fuerit, ex altera autem parte nasi ossa sustulit, vincula commissuræ debilitavit, in sinus frontales sibi viam paravit, tumoremque illum duplicem qui ab utroque latere sibi respondebat, atque lacrymalem saccum comprimebat, effecit.

§. VI.

Suspiciones quasdam, cur recessus ossium nasalium, qui tamen majorem vim quam eorum fractura requirere videtur, potius hic contigerit, atque locum, quo hæserit materies illa citrina accuratius rimari operæ pretium esse videtur. Novimus autem ex mechanicis legibus, vim percutientem pro resistantiæ, quæ ipsi opponitur magnitudine, fortius vel debilius agere, ita ut minori resistantiæ parcat, in majorem autem eo magis sæviat; cum itaque vis in nasum impingens, prouti §. præced. monui, præsertim in nasi radicem egerit, minor ab ipsis ossibus facta est resistantia, major autem a futura, quæ cum frontali committitur; inde factum est, ut cum resistantiæ tamen prævaleret vis percutiens, futura ista a se invicem divulsa, dentiumque qua illa firmatur plures effracti sint, quo facto narium ossa ab effuso super membranam humore pedetentim aucto elevata ac penitus a vicinis separata fuerint. Ut autem, quem occupaverit materia collecta locum plenius perspiciamus, nasi superioris structuram
repetere

répétere necesse est. Narium ossa, interna sua parte, ossis Ethmoidei mediæ laminæ incumbere, & ex hujus utraque parte innumeras ejus ossis cellulas narium cavitatem augere, notum est; sed in istas cellulas exonerant se sinus frontales majore vel minore, pro varia sua magnitudine, apertura, inter muscutorum trochleatorum annulos *b*), ita ut remotis nasi ossibus istæ aperturæ fere illico appareant; has omnes & singulas caveas investit membrana pituitaria non eadem ubique crassitie gaudens, ad nasi præcipue radicem haud ita compacta. Effuso itaque inter nasi ossa atque membranam Schneiderianam, qua laminam descendantem ethmoidei ossis investit, humore, eum pedetentim mole auctum inter duplicem Membranæ laminam ibi, ubi ad reliquas caveas investiendas sese adaptat, hæsisse, ibique ob membranæ integritatem in nares penetrare non potuisse, & in ratione qua mole crescebat, ossa nasi elevasse, satis quisque videt; quo magis autem elevabantur ossa, eo liberior fuit humori effuso aditus in sinus frontales, quos in nostro subjecto satis amplos fuisse indicabat capitis quadratura, demonstrabatque styli immissi profunda demersio; collectus hic liquor non solum membranam indies fortius premebat, resorptionique fluidi oberat, sed & pondere suo ac copia quaquaversum urgens ossium a vicinis promovebat remotionem; ita ut nullum supersit dubium, sinus frontales ab ista aqua repletos, & hunc humorem membranæ adversæ parti, ubi ejus duæ laminæ sibi occurrunt, incubuisse, ita, ut ex una parte narium cavitas minuta, ex altera nasi ossa in tumorem elevata sint, qui vicinis quoque partibus molestiam intulit, ac proruperint tumores ex lateralibus seces-

C

b) WINSLOW *Expos. Anat.* T. IV. Tr. de la tête n. 321. pag. 295. Amstel. 1752.

fibus, quos Offa nasi cum maxillaribus faciebant, qui se se digitis tangendos obtulerunt. Potest itaque Casus noster Recessus ossium nasi, cum tumore, cysticis simile serum alente, complicati nomine indicari.

§. VII.

Nec minoris momenti est inquirere, quomodo per tantum temporis spatium, quo aqua hæcce sensim sensimque sese collegit, se incorruptam potuerit servare, cum vel vulgo notum sit, omnes nostros humores, sive justo celerius moti fuerint, sive extra circulum aliquandiu quieverint, alcalinam induere naturam, atque pessima quæque mala producere, quorum tristitia exempla apud Auctores prostant *i*). Sed ne in putredinem abierit in nostro tumore liquor, multas concurrisse causas existimo. Etenim primo non ita videtur ille quievisse, quin aliqua saltem ejus pars perpetuo a paucis illæsis resorbentibus vasis ad sanguinis circulum redux facta fuerit, quæ quidem quantitas illi, quæ per arterias advehebatur, par esse non potuit, sed motum tamen aliquem in isto liquore conservavit; quod collectionis diuturnitas satis innuere videtur: præterea fluidissima illa sanguinis pars, quam lympham vocamus, quæque materiæ in membrana pituitaria secretæ maximam partem efficit, magis ad elementarem naturam accedere, atque corruptioni non ita obnoxia esse videtur; quamvis enim hydropica materia ad illud genus quoque referri debeat, quæ tamen alcalinam jam acrimoniam prodere incipit, satis cuique constat, sanguinis principia in isto affectu non rite inter se invicem

i) *Hist. de l'Acad. Roy. des Sc. A. 1727. p. 17. atque Mem. de l'Acad. de Chirurg. T. I. p. 90.*

mixta esse, ita ut ad alcaliescentiam proniora sint; in nostro autem ægroto nonnisi optimæ notæ humores elaborabantur, qui ad affusam partem delati sanissimam lympham ad collectionem ejus humoris subministraverunt; ita Hydatide, testiculo per satis longum tempus appenso, cum ferro separata fuerit, nonnisi limpidissima lymphæ effusa est *i* *); plurimos quoque serosos frigidosque humores, fatuam, si secentur, emittere lympham observavit Cl. RISLER *k*). Potissimum autem considerata hic est aëris externi in fermentatione putredinosa vis, sine quo, quamvis plane non fieri posse istam asserere nolim, imperfecta tamen ac non valde sensibilis oriri potest *l*), cum aëris in humoribus nostris inclusi ea sit indoles, ut elatere careat, quem nonnisi accedente externo recuperare potest, nec per se fermentationem excitare. Cum itaque in nostro tumore humor alias ad putredinem non pronus, non plane quiescens, in loco ab aëre undique tuto hæserit, facile concipi posse existimo, innocentem fatuumque per plures annos mansisse, cum vel aptiores ad putrescendum partes, placenta nimirum atque foetus nonnisi imperfectam induisse corruptelam atque illibato utero satis diu gestatas fuisse legamus *m*).

§. VIII.

Signa ex quibus luxationem factam esse cognoscimus, in duo genera distribuunt Auctores, quorum unum com-

C 2

i * Journ. de Med. T. XI. mens. Nov.

k) Diff. de Tumor. cyst. ser. 1766. §. X. p. 28.

l) v. Ill. SPIELMANNI, Præceptoris æterni Venerandi, Institut. Chem. §. XCIV. p. 326. sq.

m) QUESNAI Oeconom. anim. T. II. p. 121. Paris. 1747.

munium, alterum *propriorum* nomine insignitur, utro-
rumque significationem satis indicat denominatio; com-
munia nempe nullas non comitantur luxationes, propria
autem singulis tantum competunt, ac ex cujusque mem-
bri structura & usu aptissime desumi possunt. Aliquando
satis facilem esse luxationis diagnosin, aliquando etiam
difficiliorem *n*), utque probe distinguatur, non solum
præsentia signa, sed & quæ prædecefferunt sedulo inqui-
renda esse, inter artis peritissimos constat, quod in nostro
præcipue casu erat attendendum; ad quem signorum lu-
xationis communium paucissima quadrabant, propria au-
tem ob recessus causam earumque partium structuram
singularia prorsus esse debebant, quorum ob casus rari-
tatem ullam apud Auctores mentionem occurrere dubito.
Quando quidem omnia, quæ eum comitata sunt sympto-
mata attento animo rimor, ossium recessum effectum po-
tius morbi, quam ipsum morbum, appellari posse video;
ita ut hic in aquæ collectione ponendus, indeque reliqua
quæ sese sistebant symptomata deducenda esse videantur.
Humorem autem hic confluxisse satis demonstrabat tumo-
ris fluctuatio, in quo non pus, sed frigidam quandam
materiem inclusam esse diuturnitas mali, cæterorumque
suppurationis signorum absentia manifeste innuere vide-
bantur. Originem ejus effusionis conjecturari licebat ex
acceptæ injuriæ historia, quam cum earum partium te-
nera structura ita comparabat Vir Experientissimus, ut
facile concluderet, illatam membranæ pituitariæ vim, im-
peditamque materiæ, quæ in ea secernitur, resorptionem,
primam fuisse mali causam. Nisi ossa ita ex futura sua
erant avulsa, ut sub cute fluctuarent, eorumque superior
pars, qua cum frontali committuntur, digitis quam fa-
cillime contrectari potuerit: his extra dubium positis, re-

n) VAN SWIETEN *Comment. in Bærbaav.* ad *Aph.* §. 365.

liqua casum concomitantia symptomata facile explicari posse, nemo est, qui non videat. A tumore enim, qui totam nasi radicem ab uno ad alterum usque oculi cantum occupabat, ita premebantur sacci lacrymalis aperturæ, quas Puncta lacrymalia vocant Anatomici, ut, quam naturaliter recipiunt lacrymarum materiem motu palpebrarum ad ipsa depulsam o), super oculum reliquerint turpi spectaculo ab inferiori palpebra defluentem. Dolores, quos ægroto afferebant futuræ cœli variationes, non poterant non aëris modo gravioris modo levioris, adeoque membranarum nervorum pressione ac distensione sensibilissimam factam magis vel minus afficientis esse effectus; cutim denique diuturna extensione elateris suo parte esse privatam, satis probabiliter colligi poterat. Ita comparatis, quæ præcesserant, cum præsentibus signis, diagnosis morbi iusta atque probabilis, quam eventus certissimam esse probavit, superstructa est, ex qua facilius morbi prognosis atque expedita curæ ratio tanquam axiomata sequebantur.

§. IX.

Prognosi potissimum morbum nostrum a reliquis luxationibus differre, supra monui p). Sic enim instantibus rebus, quid timendum, quid sperandum fuerit ægroto nostro ex iis, quæ præcedente §. tradidi, pronò fluere alveo satis perspicitur. Malum hucusque leve, symptomatibus haud ita gravibus stipatum, ac, licet satis vetustum, facile tamen adhibita, efficaciori Chirurgia sanan-

C 3

o) Ill. DE HALLER *Pr. Lin. Phys.* §. D.

p) §. III. p. 15.

dum, si ulterius sprevisset dolorum patiens miles in summa affectarum eisque vicinarum partium teneritate, maximorum vixque sanandorum post se traxisset malorum catervam. Etenim ipsam collectam materiem si consideres, quamvis eam validis hucusque auxiliis Natura a putredine defenderit, quid suspicari impedit, eam diuturniore mora omnium animalium partium, quas vita destituit, legem secuturam, inque sui consortium quas attingeret partes, tracturam fuisse. Cerebrum in tanta harum partium vicinia constitutum, vasculisque per laminam multiformis ossis cribrosam descendantibus cum istis communicationem alens *q*), quam primum hæc ab alluente aëris materia erosa fuissent, derivato sanguine inflammationi, ejusque pedissequis malis obnoxium fuisset, quæ hominem inevitabili morte abripuissent; nec minus in reliquis, acrimonia ista sæviisset partes, namque Membranæ pituitariæ erosio, materiæ e naribus fluxus, ejusdem in narium reliquis cavitates derivatio, harum excoriatio, ex membranæ autem irritationibus dolores stupendi, spasmi, convulsiones, sique tandem ossibus labem suam communicasset materia, eorum caries in tam spongiosis ossibus cito crescens ac ægre vel plane non sanabilis, omnium denique internarum ac vicinarum partium inflammatio, gangræna, sphacelus, atque infecta mox eodem vitio sanguinis tota massa mors inevitabili Naturæ lege subsecuta fuissent. Ista quidem materiæ probabilem supponunt corruptionem, sed antequam ad hanc periculi magnitudinem perventum fuisset, innocentem suam indolem adhuc conservans materia sola longiore in his partibus mora, tristēs satis tragœdias ludere valebat. Ossa nasi loco suo mota, cum succo quo ali consueverant privata fuisse nemo non videat, nullum superest dubium, quin alimenti defectu emortua, carie quam siccam vocant Chirurgi correpta,

q) Ill. DE HALLER *prim. Lin. Phys.* §. CCCCLVIII.

labe sua tandem ipsam materiem infectura, reliquaue ex hoc oriunda mala productura fuissent *r*); hæc sunt præcipua quæ materies effusa ipsis, quibus includebatur partibus, minabatur mala, sed nec vicinæ a periculis erant immunes: etenim, cum tumore nasi radice protuberans materiæ lacrymalis resorptionem impediret, saccusque ipse ita comprimeretur, ut per palpebram inferiorem deflueret lacryma, metusque esset, ne iste in totum elideretur, quid ex Naturæ legibus certius, quam quod ejus cavitationis concretio mox secutura, atque rebelle illud malum oriturum erat, quod Fistulam lacrymalem vocant Chirurghi? Sed & visionis tenerrimum instrumentum sua passurum erat mala: namque lacrymalis materiæ pronissima est ad acrimoniam indoles, ita ut genis, si quando in tristi affectu per illas defluat, istam dotem satis manifesto demonstret, quin & eas excoriasse legatur *s*); nota autem est quoque sensilissima oculi natura, ut vel levissimo immisso acri doleat, inflammetur, ac nisi promptissimo adhibito auxilio in suppurationem abeat; inde concludere licet, istam materiem in immensum auctam, diutius super oculum, sinistrum præcipue, in cujus cantho magis eminebat tumor, relictam, pessimæ notæ, ac nisi diffilato tumore discutiendam Epiphoram, dubio procul excitare debuisse; omnem istam malorum copiam prudenti dissectione cavit Chirurgus, quam prospere cessuram, per

r) Cum nullum dubium supersit, quin dentes, quos supra diximus, effractos fuisse, in incisionibus sibi respondentibus remanserint, videri quidem posset, idem illis instituisse periculum; sed si minimas quis arteriarum ramificationes inter duo articulata ossa nunquam non excurrentes perpendere velit, facile, ab isto metu liberos fuisse, videbit.

s) HALLER *El. Phys.* Tom. V. Libr. XVI. Sect. I. §. XV. & *pr. Lin. Physiol.* §. D.

integram cæterum hominis valetudinem ac vulneris facilem curationem confidenter sperare licebat.

§. X.

Os dislocatum in suam sedem reducere generalis est omnium luxationum indicatio, quæ in nostro quoque casu omnino locum habebat; ut autem reponi potuerint nasi ossa, primaria hic oriebatur indicatio, a materiæ heterogeneæ necessaria remotione repetenda; his itaque duobus absolvi debebat morbi nostri cura. Siquidem recenti statim malo medelam afferre licuisset, discutientibus valenter remediis materiæ collectio, tumorisque elevatio satis probabiliter fuissent cohibitæ *t*). Inveterato autem per quadriennii spatium malo, ut aperiretur tumor, atque evoca-

- t*) Hanc curandi methodum, ubi ob percussum femur, sævientem qui intus dolorem metus est, ne a confluyente intus humore os prolabatur, prudenter proponit Cel. PLATNER. *Instit. Chir.* §. 1201. not. * & **. "Veteres autem" inquit, "prout ex HIPPOCRATE atque ÆGINETA discimus, in his casibus, ferrum candens imprimere, magnamque suppurationem concitare soliti fuerunt." Hæ crudeliores curandi methodi raro hodie apud nos in usum veniunt, eis-que scindens scalpellum substituere malumus, cujus in confluyente intra articulum humore diutius morante, auxilium me quidem iudice, reliquis præferendum est. Rejicit quidem illam Cel. Vir, amicumque, qui ea usus est, probare non videtur, rigiditatem articuli a ligamentorum incisione timens. Sed insignis in arte Vir nimis timidus hac in causa fuisse videtur. Namque ex una parte articuli rigiditas malis ab humore in articulo collecto oriundis præferenda videtur, cum non alio nisi scalpelli auxilio evocari iste potest, ex altera parte experimentis hodie constat, ligamenta sine periculo posse incidi, ubi necessitas urget, Sæpius se articulorum ligamenta prospero cum successu incidisset. pus eliceret, testatur dext. RAVATON in *Traité des Playes d'Armes à feu* passim.

evocaretur materies ista prima mali causa, expeditior nulla via quam ferrum, ac optimo quidem jure visum est; quamvis autem & hodie sint, qui sectiones, ubicunque etiam instituendæ sint, reformidant, ac propter secandi imperitiam aut præconceptam opinionem Emplastris fidem suam addixerunt, illud tamen apud maximos quoque artis magistros in confesso est, sectionem omnium fere frigidorum tumorum optimam quin solam esse medelam. Attamen, cum locus, quo in casu nostro instituta est sectio, periculi ad incidendum sit plenus, ac circumspectam quam maxime requirat manum, quæri posset, annon per nares instituta desideratum quoque eventum cum minori periculo habere potuerit? Sed ut taceam, prudentis esse Chirurghi, eas ad incidendum, quantum fieri potest, feligere plagas, in quibus manum suam operantem oculis comitari possit, cum nunquam non eo faustiores eventus fortiantur sectionum curæ, quo facilius quid secet, oculis usurpare potest Operator, idque in nasalium cavearum obscuritate fieri nequaquam potuisse; illud maxime ab hac curandi methodo abstertere debuit, quod ita evocata materia in narium reliquas cavitates, fauces atque asperam arteriam inclinari, nausea, tussis excitari, & hinc majora illis, quæ vitare voluissimus incommoda, ex ista operatione non potuissent non nasci. Elucescit exinde, commodam atque expeditissimam in morbi nostri cura selectam esse methodum, qua cum integumentis, cauta sectione, membrana pituitaria, in cujus adversa parte humorem hæsisse, supra monui *n*), divisa, materiæque exitus datus est. Symptomata hanc sectionem secuta reliquam curationem concomitata, operæ pretium est, ut ordine rimemur. Nervosissimas vasculisque plenas esse, quæ hic incisæ sunt partes, cutem nempe mem-

D

n) §. VI. p. 17.

branamque pituitariam, hancque cum externo periosteo super totam continuari faciem docet Anatome, sensibilissimam autem harum partium esse naturam, ita ut ab accepta injuria longe lateque doleant, inflammentur, partesque vicinas sympathice afficiant, ex Chirurgiæ principiis constat; hinc immanis illa Cephalalgia, Febris ejusque fida comes sitis, faciei intumescencia, palpebrarum inflammatio, quæ sectionem excipiebant; hæc tamen terribilia symptomata, aptis remediis, fugata fuerunt. Eisdem hujus membranæ sensibilitati ex parte adscribendam esse duco, intolerabilem illam molestiam, quam ægro immissa vulnere spongia præparata excitabat, eam autem ex parte quoque materiæ in vulnere post sectionem collectæ, retentioni tribuendam esse arbitror; quare ne materiæ necessario continuum effluxum laxior vulnusque claudens cutis vel Spongia præparata impedirent, aptius non potuit adhiberi auxilium, quam ex tenuissima Plumbi lamella conflata cannulæ, per quas inferiori vulneris parti immixtas continuo exiret liquor; cujus cum immi-
nueretur copia, ne illæ a sanatione vulnus impedirent, indies minores immisit Chirurgus. Nec illud mirandum, quod tantam, post sectionem, fuderit vulnus humoris copiam; per quadriennii enim, quo tumorem istum gessit miles noster, spatium, ita debilitatæ sunt venæ resorbentes venæ, ut restituta licet libertate, reddita tamen nondum fuerit functiones suas obeundi facultas, usque dum sedulo adhibitis roborantibus ac detergentibus, quæ hic convenientissima erant remediis, sedatus ille fluxus, roboratæque debilitatæ partes fuerint, quo facto consolidare vulnus per sanioris Chirurgiæ regulas licuit. Integra alias hominis valetudo ac rarius temperamentum a febre istum interim fervavit liberum, ut tamen ab ista poenas vitiorum in diætæ commissorum subinde quoque

lueret. Dissipato tandem ipso malo reliquum erat ossa in situ suo firmare, eorum vinculis, atque integumentis diuturniori extensioni elatere privatis, pristinum iterum robur conciliare, quod optime fecit Chirurgus, dum secundum Cel. HEISTERI præceptum x) “nulla alia curatione quam quæ comprimendo ac deligando fit” usus est. Ita medentium communi officio cito nempe tuto ac jucunde, quantum fieri potest, curandi, hoc in casu, exasse satisfecit Chirurgus.

x) *Inst. Chir. P. I. L. III. C. III. §. I.*



